

## IN MEMORIAM

### DR VANČO BOŠKOV (1934-1984)

U Skoplju je početkom 1984. iznenada preminuo dr Vančo Boškov, istaknuti turkolog, profesor Sarajevskog i Skopskog univerziteta i saradnik više naučnih institucija iz oblasti orijentalistike. Njegovom smrću Sarajevski i Skopski univerzitet izgubili su vrijednog saradnika, a jugoslovenska turkologija predanog istraživača i stručnjaka.

Vančo Boškov je rođen 8. 1. 1934. g. u Negotino-Vardar. Osnovno obrazovanje stekao je u Kavadarcima, Velesu i Negotinu, a srednje obrazovanje u Kavadarcima, gdje završava gimnaziju godine 1952. Te iste godine, upisuje se na Filozofski fakultet u Sarajevu, grupa orijentalistika (turski i arapski jezik sa nacionalnom historijom). Sve vrijeme školovanja u Sarajevu, stipendista je Savjeta za prosvetu i kulturu NR Makedonije. Studij iz oblasti orijentalistike završava godine 1957, a od 1958. do 1963. g. radi u Državnom arhivu Makedonije na registrowanju i objavljivanju historijskih dokumenata iz osmanske epohe, posebno sidžila bitoljskog kadije. U međuvremenu, provodi dvije godine (od 1960-1962) u Kairu kao stipendista egipatske vlade.

Nakon povratka sa specijalizacije u Kairu, u maju 1963. g. počinje s radom na Filozofskom fakultetu u Sarajevu kao asistent za turski jezik i književnost, a godine 1970. brani doktorsku disertaciju »Ljubavna lirika Ishaka Čelebija — Kritički tekst i književno-estetska analiza«. U junu iste godine, unaprijeđen je u docenta za tursku književnost. Kao stipendista Fondacije Alexandar von Humbolt odlazi, zatim, na dvije godine (od 1971-1973) na Institut za istoriju i kulturu za Bliski Istok u Minhen kod prof. Hansa J. Kisslinga. U junu 1975. g. biva biran za vanrednog profesora na Filozofskom fakultetu u Sarajevu.

Pored turske književnosti, prof. Boškov, od 1973. godine, drži kurseve iz turske diplomatike i osmanskog jezika na Odsjeku za orijentalistiku Filozofskog fakulteta u Sarajevu.

Istovremeno je na Odsjeku za istoriju na istom Fakultetu angažovan u nastavi ova dva predmeta na postdiplomskom studiju.

Godine 1980. prof. Boškov prelazi sa Sarajevskog na Skopski univerzitet gdje u svojstvu redovnog profesora predaje osmanski

jezik na Katedri za turski jezik i književnost pri Filološkom fakultetu. Na toj dužnosti ostaje do posljednjeg dana svog života.

Pored toga što savjesno obavlja dužnosti nastavnika, prof. dr Vančo Boškov je živo uključen u kulturno-naučni i društveni rad Bosne i Hercegovine i Jugoslavije. Član je niza foruma na Filozofskom fakultetu u Sarajevu, član Redakcije »Kulturno nasljeđe« u izdavačkoj kući »Svjetlost« iz Sarajeva, član Savjeta Orijentalnog instituta u Sarajevu, član Potkomisije za literaturu na orijentalnim jezicima u Akademiji nauka i umjetnosti BiH, član Germanškog orijentalnog društva i član Izvršnog odbora Društva orijentalista BiH. Za Hilendarski odbor pri Srpskoj akademiji nauka i umjetnosti, vrši od 1974. g. istraživanja turskih dokumenata. U septembru 1978. g. učestvuje, kao organizacioni sekretar u organizaciji Trećeg međunarodnog kongresa preosmanskih i osmanskih studija (CEPO) u Sarajevu.

Tokom svog kratkog i plodnog stvaralačkog života, dr Boškov je zadužio jugoslovensku turkologiju brojnim publikacijama, uopornim radom u mnogim bibliotekama Evrope, aktivnim učestvovanjima na međunarodnim turkološkim kongresima, postavši pri kraju života Predsjednik Komiteta za osmanske i preosmanske studije (CEPO). Važno je takođe pomenuti da prof. Boškov gostuje na poziv Rektora na Varšavskom univerzitetu sa predavanjima iz ranoosmanskih dokumenata iz svetogorskih manastira, kao i to da je dugogodišnji saradnik bibliografskog časopisa »Türkologische Anzeiger« koji od 1975. g. izlazi u Beču.

Prof. Boškov je autor niza stručnih i naučnih radova.\* Dobrim dijelom ovi radovi tretiraju pitanja iz oblasti turske i osmanske književnosti, iako je najveći broj publikacija rezultat izučavanja turskih historijskih dokumenata iz osmanske epohe, pohranjenih u mnogim bibliotekama Evrope: Sarajevu, Beogradu, Svetoj gori i drugdje.

Pored pomenutih radova, prof. Boškov piše niz recenzija i prikaza, kao i niz članaka u enciklopedijama (npr. u *Enciklopediji Jugoslavije* i u *Lexikon der islamischen Welt*, Kolhammer-Verlag, Stuttgart-Berlin, Köln-Mainz).

Prof. Boškov je objavio svoje tekstove u brojnim jugoslovenskim i evropskim časopisima.

Svojim djelom, gdje više od dvadeset pet radova predstavljaju originalna naučna ostvarenja, zasnovana na izučavanju osmanskih dokumenata i turske literature, prof. Boškov daje svoj značajan doprinos proučavanju historije Turaka za vrijeme osmanske vlasti, kao i proučavanju historije jugoslovenskih naroda i njihovih kultura u doba Turaka-Osmanska. Od njegovih djela izdvajamo posebno »Katalog turskih rukopisa u franjevačkim manastirima Bosne i Hercegovine« koji treba uskoro da se pojavi u izdanju Orijentalnog instituta u Sarajevu.

\* Vidi Bibliografiju radova (str. 201—211).

Kao đak prof. Boškova, i kasnije, njegov kolega i saradnik u nekim publikacijama, željeli bismo da ovim skromnim tekstom izrazimo poštovanje nastavniku, naučniku i predanom radniku, koji čitav svoj život posvećuje turkologiji. Djelo i ličnost prof. Boškova podjednako žive u sjećanju studenata i kolega orijentalista, koji osjećaju nenadoknativ gubitak izazvan njegovim ranim i nepovratnim odlaskom.

*Jasna Šamić*